

यूहन्नां च्वःगु निगूगु पौ म्हसीका

थ्व पौ यूहन्नां “थकालि” कथं “मिसा व वया मस्तयत्” च्वःगु खः। “मिसा व वया मस्त” या अर्थ अन च्वंगु मण्डली व मण्डलीया विश्वासीत जुइमा। यूहन्नां थुकी चिहाकयक विश्वासीतयत् थःथवय् माया यानाच्वनेत व फताहा गुस्त व इमिगु शिक्षापाखें बचय् जुया च्वनेत ख्याच्चः बियातःगु दु।

धलः पौ

न्ह्यखँ १-३

माया हे दक्वसिबय् तःधं ४-६

मखुगु शिक्षापाखें बचय् जुयाच्वनेगु ख्याच्चः ७-११

क्वचाय्कूगु १२-१३

२ यूहन्ना

यूहन्नापाखें ज्वजलपा

1 परमेश्वरं ल्ययादीम्ह मिसा व वया मस्तयत् जि मण्डलीया थकालि छिमित धात्थैयागु माया याना। सत्ययात म्हस्यूपि फुक्कसिनं छिमित माया यानाच्वंगु दु।

2 थ्व सत्य झीगु नुगलय् न्ह्याबलें दयाच्वनी।

3 अले थ्व हे सत्य व मायां यानाः परमेश्वर बाः व वय्कःया काय् येशू ख्रीष्टं झीत दया माया व शान्ति बियादी।

सत्य व माया

4 झी बाःनं धयादी थें आम्कन मण्डलीइ च्वंपि गुलि गुलि मस्तयसं सत्ययात मानय् यानाच्वंगु सियाः जि तसकं हे लयतायाच्वनागु दु।

5 अयजूगुलि नं आम्कन मण्डलीइ च्वंपिन्सं थःथवय् माया याना च्वँ धकाः जिं छिमित बिन्ति याना हयागु खः। न्हापांनिसें हे झीत थःथवय् माया यानाच्वनेमाः धकाः धयातःगु खः, उकिं थ्व न्हगु खँ मखु।☆

6 वय्कःयागु आज्ञा मानय् यायेगु हे धात्थैयागु माया खः। छिमिसं न्हापांनिसें न्यंगु आज्ञा थ्व हे खः – छिमिसं थःथवय् माया याना च्वँ।

☆ 1:5 १:५ यूह १३:३४; १५:१२,१७

7 येशू ख्रीष्ट मन् जुयाः झाःगु मखु धकाः धाइपि मनूत नं थ्व संसारय् यक्व दु। थुपि फताहात खः। थुपि ख्रीष्टया शत्रुत नं खः।

8 अयजूगुलि होश यानाच्चै, मखुसा छिमिसं थथे ज्या सनाच्चंगु फुक्कं सिति वनी। बरु प्रभुं बी धकाः तयातःगु फुक्क सिरपाः काये फय्कि।

9 सुनानं येशू ख्रीष्टं स्यनादीगु खँ मानय् मयासें मेमेगु हे याना जुल धाःसा अज्याःम्ह मन् नाप परमेश्वर च्वनादी मखु। तर येशू ख्रीष्टं स्यनादीगु खँ मानय् याना जूपि नाप परमेश्वर व वय्कःया काय येशू ख्रीष्ट निम्हं च्वनादी।

10 अयजूगुलि येशू ख्रीष्टं स्यनादीगु खँ नाप पाय्छि मजुइक मेकथं हे स्यना जुइपि मनूत छिमिगु छैय् वःसा इमित दुकाये मते। थज्याःपि मनूतय्त ज्वजलपा नं याये मते।

11 सुनानं थज्याःपि फताहातय्त ज्वजलपा यासाः ज्वजलपा याःपि मनूतय्सं इमिगु मभिंगु ज्याय् ब्वति काःगु जुइ।

12 जिं छिमित च्वये माःगु खँ ला यक्व हे दु। तर मसी व भ्वंतं मखु। आम्कन हे वयाः धाये, अले झीपिं सकलें लयताय खनी।

13 ल्ययातःम्ह छिमि केहँया काय्म्हायपिन्सं छिमित ज्वजलपा धयाहःगु दु।

Newar
Newar: Newar (Bible)

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 16 May 2025 from source files
dated 17 May 2025

838cc630-4ccf-5055-be45-10a98a141cc7